

87

7. sept.

REGLUGERÐ

fyrir

Útvegsbanka Íslands h.f.**I. KAFLI.**

1. gr.

Útvegsbanki Íslands h.f. er stofnaður með lögum nr. 7, 1930. Bankinn er hlutafélag og er hlutafjárupphæðin ákveðin 7.500.000 krónur.

2. gr.

Yfirstjórn bankans er í höndum 5 manna fulltrúaráðs, sem kosið er á aðalfundi bankans. Fulltrúaráðið skipar einn aðalbankastjóra og tvo banka-
stjóra.

II. KAFLI.**Störf bankans.***A. Um ávöxtun fjár.*

3. gr.

Bankinn tekur fé til ávöxtunar svo sem hér segir:

Í hlaupareikning,
í innlánsbók,
gegn viðtökuskirteini.

4. gr.

Sá, er hefja vill hlaupareikningsviðskipti við bankann, skal um það semja við framkvæmdarstjórn hans.

5. gr.

Viðskiptamaður fær lausa kvittun fyrir innborgunum á hlaupareikning, tvíritaða, ef krafizt er.

6. gr.

Viðskiptamaður, er fé vill taka út úr hlaupareikningi, skal að jafnaði gefa út tékkávisun á bankann, á eyðublöð, er bankinn sjálfur hefir til sölu. Gerð eyðublaða ákveður fulltrúaráðið. Tékkinn skal undirskrifaður af viðskiptamanni sjálfum, af prókúrista hans eða öðrum, er hann hefir gefið lögfullt umboð til að ávísar á reikninginn, enda skal þá umboðið jafnframt afhent bankanum, ef það er eigi opinberlega tilkynnt.

Bankanum er og skylt að greiða út fé úr hlaupareikningi eftir skriflegum fyrirmælum viðskiptamanns, eða eftir símskeyti frá honum, enda sé þá undirskrift hans undir símskeytið staðfest, eða á annan hátt þannig frá gengið, að útborgun sé áhættulaus fyrir bankann. 87
7. sept.

7. gr.

Enginn má gefa út ávísun á meira fé, en hann á inni í hlaupareikningi, nema sérstaklega sé svo um samið við framkvæmdarstjórn bankans.

8. gr.

Um leið og hlaupareikningsviðskipti eru stofnuð, skal viðskiptamaður afhenda bankanum sýnishorn af undirskrift sinni. Komi það fyrir, að fölsk ávísun sé greidd af bankanum og sú ávísun er útgefin á eyðublað úr tékkhefti, sem viðskiptamaður hefir sjálfur fengið, ber sá skaðann, sem féð á, nema augljósu gáleysi bankans sé um að kenna.

9. gr.

Í tékkávisun, sem gefin er út á innstæðu í hlaupareikningi, verður upphæðin að vera tilgreind með tölustöfum og bókstöfum. Sé þess ekki gætt, þá er bankinn eigi skyldur að útborga ávísunarupphæðina. Sé fjárhæðin tilgreind öðruvísi með tölustöfum en bókstöfum, þá gildir minni upphæðin.

10. gr.

Framkvæmdarstjórnin ákveður hvort taka skuli við ákveðnu fé í hlaupareikning og hvort greiða skuli vexti af því fé, sem tekið er við.

11. gr.

Heimilt er hverjum að sjá hlaupareikning sinn í bókum bankans, og einnig umboðsmanni hans, en varast verður, að hann sjái reikning annara manna.

12. gr.

Ef ekki er öðruvísi um samið skulu vextir af hlaupareikningsfé vera 2% lægri en bankinn greiðir á sama tíma af fé í innlánsbókum.

13. gr.

Bankinn tekur á móti innlánsfé til ávöxtunar með sparisjóðskjörum, minnst 5 kr. í hvert sinn. Þó er bankinn eigi skyldur til að taka á móti mjög stórum upphæðum til ávöxtunar, ef framkvæmdarstjórnin telur það óhaganlegt fyrir bankann.

14. gr.

Þegar innstæðan nemur minnst 5 kr., reiknast vextir af heilum krónum frá og með næsta degi eftir að féð er lagt inn, þó eigi í minni hlutum en heilum aorum.

87 Vextir reiknast 1. júlí og 31. desember ár hvert og leggjast þá þegar við
7. sept. höfuðstólinn. Af upphæðum, er nema 1000 krónum eða þar yfir, er bankinn eigi skyldur að greiða vexti, þegar upphæðir þessar standa skemur en tvo mánuði í bankanum.

15. gr.

Af fé, sem bankinn ávaxtar með sparisjóðskjörum, verður greitt það, er menn óska, án uppsagnarfrests, þegar framkvæmdarstjórnin sér sér það fært, en heimta má, að upphæðum frá 1000—3000 kr. sé með viku fyrirvara sagt upp, og upphæðum þar yfir með tveggja mánaða fresti.

Án tveggja mánaða uppsagnarfrests er bankinn eigi skyldur að borga meira en 5000 kr. á mánuði hverjum úr sömu viðskiptabók.

16. gr.

Þeim, er í fyrsta sinn leggur inn fé með sparisjóðskjörum, er fengin viðskiptabók, er hann greiðir 50 aura fyrir. Framkvæmdarstjórnin ákveður hvort sú borgun er tekin fyrirfram eða þegar bókin er útskrifuð eða ónýtt.

Í hvert skipti, sem fé er lagt inn eða tekið út úr sparisjóði, skal það um leið vera ritað í viðskiptabókina. Þó má í sérstökum tilfellum taka við fé án þess bókin sé sýnd, gegn kvittun bókara og féhirðis.

Heimilt er að stofna sérstaka deild við sparisjóðinn þar sem taka má við innlögum og ávísá á innstæðuna, án þess viðskiptabókin sé sýnd. Skulu slík innlög og útborganir færast í viðskiptabókina þegar hún er næst sýnd í bankanum. Viðskiptabækur við þá deild skulu greinilega bera með sér, að gefa megi út ávísanir á innstæðuna.

Fyrir innlögum og útborgunum kvittar bókari og féhirðir í viðskiptabókina, og er það full sönnun fyrir greiðslunni.

Það er eigi á ábyrgð bankans, þótt handhafi viðskiptabókar hafi eigi haft löglega heimild frá eiganda hennar til að fá útborgað fé það, er viðskiptabókin hljóðar um eða eitthvað af því. Um falskar ávísanir á sparisjóðsinnstæður gilda ákvæði 8. gr.

Vexti skal innfæra í viðskiptabækur 1. júlí og 31. des. ár hvert. Framkvæmdarstjórn löggildir innlánsbækurnar eða þeir starfsmenn bankans, sem bankaráðið gefur umboð til þess.

17. gr.

Glatist innlánsbók, ber eiganda að snúa sér til framkvæmdarstjórnarinnar, er annast um, að handhafa hennar verði stefnt samkvæmt 50. gr. laga um Landsbanka Íslands nr. 10, 15. apríl 1928, sbr. 9. gr. laga nr. 7, 1930.

18. gr.

Framkvæmdarstjórninni er heimilt að segja lausu fé, sem er á vöxtum í bankanum með sparisjóðskjörum, með þriggja mánaða fresti. Skal annaðhvort rita uppsögnina í innlánsbókina eða gefa út auglýsingu um hana, er sé birt í

Því blaði Reykjavíkur, er stjórnarvalda auglýsingar skulu birtar í, óg að minnsta kosti í tveim öðrum blöðum.

87
7. sept.

Eftir gjalddaga eru engir vextir greiddir af því, sem uppsagt er.

19. gr.

Ef eigandi að innstæðufé hvorki leggur inn né tekur út í 15 ár samfleytt, verður hætt að greiða vexti af því, og verður þá með auglýsingu, er skal birt með missiris fyrirvara á þann hátt, sem segir í 17. gr., skorað á eiganda að hirða féð. Gefi hann sig ekki fram áður en fresturinn er liðinn, er innlánsbók hans ógild, en féð ásamt vöxtunum rennur í bankann; þó má bankastjórnin greiða féð, að meira eða minna leyti, ef réttur eigandi gefur sig fram innan 5 ára og fulltrúaráðið leyfir.

20. gr.

Mönnum verða eigi gefnar upplýsingar um eignir annara, nema skylt sé að lögum.

21. gr.

Sá, sem tekið hefir allt út úr innlánsbók sinni, skal skila henni í bankann; sé bók útskrifuð, fær hann aðra bók ókeypis, ef hann vill halda viðskiptunum áfram.

22. gr.

Ennfremur er bankanum heimilt að taka fé til ávöxtunum eftir sérstökum samningi í hvert skipti og gefa viðtökuskírteini fyrir fénu.

B. Um útlán.

23. gr.

Útlánsstarfsemi bankans skal hagað svo, að sem bezt samrýmist aðalhlutverki hans, að styðja og efla sjávarútveg, verzlun og iðnað landsmanna.

24. gr.

Bankanum er heimilt að kaupa og selja víxla, tékka og ávísanir, hvort sem greiðsla á að fara fram innan lands eða utan.

25. gr.

Bankinn veitir, umfram það sem ræðir um í 24. gr., lán í því formi og gegn þeim tryggingum, er nú skal greina:

- a. Reikningslán.
- b. Sjálfskuldarábyrgðarlán.
- c. Lán gegn fasteignarveði.
- d. Lán gegn handveði.
- e. Lán gegn ábyrgð sýslu- eða bæjarfélaga.

87

7. sept.

26. gr.

Um reikningslán skal gerður sérstakur lánessamningur og undirritaður af framkvæmdarstjórn bankans og lántakanda. Skal í honum greint hámark lánsins, uppsagnarfrestur af hálfu beggja aðilja, trygging fyrir láninu og hverja vexti skuli greiða bæði af skuld og innstæðu. Reikningslán skulu að jafnaði einungis veitt gegn fasteignarveði eða handveði í vel tryggðum verðbréfum, en heimilt er þó að taka aðrar tryggingar, ef sérstök ástæða þykir til.

Um innborganir og útborganir gilda sömu reglur og um hlaupareikninga.

27. gr.

Sjálfskuldarábyrgðarlán má eigi veita nema til eins árs í senn, en heimilt er að framlengja þau, ef framkvæmdarstjórn telur það áhættulaust fyrir bankann. Samanlagður lánstími má þó aldrei vera lengri en 10 ár.

28. gr.

Lán samkv. c.-lið 25. gr. má veita gegn sérhverjum veðrétti í fasteign, er stjórn bankans telur fullnægjandi tryggingu fyrir láninu. Þegar meta skal veðhæfi fasteigna skal fasteignamat þeirra að jafnaði lagt til grundvallar.

Ef líkur eru til að verðbreytingar hafi orðið á fasteign frá því síðasta fasteignamat fór fram má láta nýtt mat fram fara. Skal það framkvæmt annaðhvort af dómkvöddum mönnum eða af mönnum, sem stjórn bankans tilnefnir sjálf. Að öðru leyti skal lánbeiðandi útvega sérhver þau skilríki, sem banka-stjórn krefst og málið varða.

Lán gegn fasteignarveði skulu að jafnaði eigi veitt til lengri tíma en 20 ára.

29. gr.

Bankinn lánar fé gegn handveði, svo sem arðberandi, vel tryggðum verðbréfum og öðrum þeim munum, sem framkvæmdarstjórnin tekur gilda og sér bankanum fært að geyma.

Ennfremur má veita lán gegn tryggingu í fiski og fiskiafurðum, í vátryggðum verzlunarvörum, sem bankanum eða trúnaðarmönnum hans eru afhentar sem handveðstrygging, eða vörum samkvæmt farmskírteini eða geymsluskírteini, sem bankanum er afhent og framselt.

30. gr.

Bankinn má veita lán gegn veði í eignum og tekjum bæjar- og sýslu- og sveitarfélaga, og gegn ábyrgð þeirra sem slíkra, þegar eftirfylgjandi skilyrði eru fyrir hendi:

- a. Leyfi hlutaðeigandi stjórnarvalda (sýslunefndar og stjórnarráðs) til lántöku-unnar.
- b. Fjárhagsreikningur sýslunnar, sveitar- og bæjarfélagsins næsta ár á undan lánbeiðninni.

- c. Vottorð hlutaðeigandi yfirvalda um það, að þeir menn, sem annast um lán-tökuna eða veita umboð til að taka lánið, séu réttir hlutaðeigendur.
- d. Útskrift úr fundarbók lánbeiðanda, sem sýni, að löglega hafi verið samþykkt að taka lánið, og sé útskriftin staðfest af hlutaðeigandi yfirvaldi.
- e. Ábyrgðaryfirlýsing hreppsnefndar, sýslunefndar eða bæjarstjórnar.

87
7. sept.

C. Ábyrgðir.

31. gr.

Bankinn getur tekizt á hendur ábyrgðir utan lands og innan, gegn tryggingum, jafngóðum og um lán væri að ræða.

D. Innheimtur.

32. gr.

Bankinn má annast allskonar innheimtur á fjárhæðum fyrir innlenda og erlenda kröfuhafa, bæði hérlendis og erlendis.

III. KAFLI.

Reikningur og endurskoðun.

33. gr.

Ársreikningur bankans, sem miðast við almanaksárið, skal saminn í síðasta lagi þremur mánuðum eftir árslok og birtur í Stjórnartíðindunum að afloknum aðalfundi, en yfirlit yfir hag bankans skal birta eftir hver mánaðamót. Skal reikningurinn svo mikið sundurliðaður sem fulltrúaráðið leggur fyrir þannig, að hann sýni glögga mynd af hag bankans.

34. gr.

Aðalfundur hluthafa kýs (með hlutfallskosningu) tvo bókhaldsfróða endurskoðendur og skulu þeir rannsaka reikning bankans og bera saman við bækurnar og við sjóð bankans og eignir. Sjálfar bækurnar og færslu á þeim skulu þeir einnig rannsaka, svo að þeir séu þess fullvissir að bókhaldið sýni rétta mynd af því, sem fram hefir farið.

Ef þeir verða þess varir, að vanræksla eigi sér stað í einhverju eða að nauðsynlegar endurbætur þurfi að gera, þá eiga þeir að benda bankaráðinu á það og gera uppástungur um endurbæturnar.

35. gr.

Allar leiðréttingar eða breytingar í bókum bankans skulu þannig gerðar að glöggst sjáist, hvað þar hefir staðið upphaflega.

Endurskoðendur skulu framkvæma starf sitt samkvæmt erindisbréfi, sem fulltrúaráðið setur þeim.

IV. KAFLI.

Um stjórn bankans.

37. gr.

Fulltrúaráð bankans hefir yfirlýsningu með eignum bankans og allri starfsemi hans. Það setur framkvæmdarstjórn bankans erindisbréf. Ásamt með framkvæmdarstjórninni ákveður það forvexti, útlánsvexti og innlánsvexti bankans og sér um að vaxtabreytingar allar séu hæfilega auglýstar fyrir almenningi. Það ákveður og, hvenær bankinn skuli opin fyrir almenning.

38. gr.

Fulltrúaráðið heldur fundi eigi sjaldnar en tvisvar í mánuði hverjum. Auk þess skal formanni þess skyld að koma í bankann eigi sjaldnar en vikulega og kynna sér ítarlega starfsemi hans. Skál hann sérstaklega líta eftir útlánsstarfsemi bankastjóranna og gerir hann fulltrúaráðinu aðvart, ef hann telur hana á einhvern hátt athugasemda. Formanni ber og að fylgjast með erlendum skuldaskiptum bankans og yfirlétt líta eftir allri starfsemi hans í höfuðdráttum. Hver einstakur fulltrúi í fulltrúaráðinu hefir aðgang að bókum og skjölum bankans til eftirlits, enda hvílir á honum fullkomin þagnarskylda.

39. gr.

Tveir bankastjórar skulu undirskrifa svo að skuldbindi bankann, ef gefa skal út eða framselja vixla, önnur verðbréf eða skriflegar skuldbindingar. Þó er fulltrúaráðinu heimilt að veita tilteknum starfsmönnum bankans umboð til að skuldbinda bankann í þessum efnum með undirskrift sinni ásamt einum bankastjóra. Þó þarf jafnan samþykki fulltrúaráðsins til að taka erlend lán.

Framkvæmdarstjórn annast hinn daglega rekstur bankans, ræður starfsfólk bankans, og skiptir með því verkum, með þeim takmörkunum sem settar eru í samþykktum bankans, og lítur eftir að starfsfólkið ræki störf sín, en fulltrúaráðið setur reglur um laun starfsmanna. Öllum starfsmönnum bankans er óheimilt að skýra óviðkomandi mönnum frá viðskiptum manna við bankann.

V. KAFLI.

87

7. sept.

Ýms ákvæði.

40. gr.

Kvittanir frá bankanum eru því aðeins fullgildar, að féhirðir hafi ritað undir þær, og þeim fylgi áritun bókara um, að þær séu athugaðar. Í forföllum þeirra er þó jafngild kvittun þess eða þeirra, er þeir fela starf sitt í samráði við framkvæmdarstjórnina.

41. gr.

Féhirðir bankans skal setja tryggingu fyrir fé því, er honum er trúað fyrir, sem framkvæmdarstjórn og fulltrúaráð tekur gilda.

Féhirðir ber ábyrgð á þeim, sem í forföllum hans eða af öðrum ástæðum annast störfina, ef eigi er séð fyrir að varamennirnir eða aðstoðarmennirnir setji tryggingu, meðan þeir gegna störfum féhirðis.

42. gr.

Starfsmenn bankans eru skyldugir til að vinna framyfir venjulegan starfstíma bankans, þegar þess er þörf.

43. gr.

Starfsmennirnir mega ekki án leyfis framkvæmdarstjórnar taka að sér annað launað starf eða reka atvinnu.

44. gr.

Embættismönnum og starfsmönnum bankans er bannað að gerast umboðsmenn annara gagnvart bankanum.

45. gr.

Þeir, sem vilja fá lán úr bankanum, skulu beiðast þess skriflega og geta þeir fengið prentuð eyðublöð undir slíkar beiðnir í bankanum. Skriflegs svars við slíkri beiðni verður ekki krafizt, og getur enginn, sem synjað er um lán, heimtað, að honum sé gerð grein fyrir, hverjar ástæður séu til synjunarinnar.

46. gr.

Sérhver skuldunautur bankans má greiða lán það, er hann hefir fengið, allt eða nokkurn hluta þess áður en gjalddagi sá, sem ákveðinn er í skuldabréfinu, er kominn, og fær hann þá endurgoldinn tiltölulegan hluta þeirra vaxta er hann hefir fyrirfram greitt af upphæð þeirri, sem hann greiðir fyrir réttan gjalddaga, en eigi hærri vexti en bankinn á þeim tíma gefur fyrir sparisjóðsinnlög, þó getur framkvæmdarstjórnin breytt til um vaxtagreiðsluna, ef ástæða

87 þykir til. Vaxtaupphæðin skal nema meiru en 3 kr. til þess, að endurgreiðsla á 7. sept. vöxtum geti komið til greina.

47. gr.

Þangað til lokið er inndrætti seðla Íslandsbanka, þeirra, sem í umferð eru, haldast í gildi ákvæði 3. kafla reglugerðar Íslandsbanka frá 6. júní 1923.

48. gr.

Fulltrúaráðið hefir heimild til að breyta ákvæðum reglugerðar þessarar innan þeirra takmarka, sem samþykktir félagsins heimila.

Reglugerðin, þannig breytt, samþykkt á framhaldsaðalfundi Útvegsbanka Íslands h/f, sem haldinn var 22. júlí 1932.

Fulltrúaráð Útvegsbanka Íslands h/f.

*Sv. Guðmundsson. Stefán Jóh. Stefánsson. Lárus Fjeldsted.
Páll Eggert Ólason. Guðm. Ásbjörnsson.*

Framanrituð reglugerð staðfestist sem reglugerð fyrir Útvegsbanka Íslands h/f.

Fjármálaráðuneytið, 7. september 1932.

Ásgeir Ásgeirsson.

Gísli Bjarnason.

88

7. sept.

SAMÞYKKT

fyrir

Útvegsbanka Íslands h/f.

I. KAFLI

Almenn ákvæði.

1. gr.

Nafn félagsins er „Útvegsbanki Íslands h/f“. Í samþykkt þessari kallað Útvegsbankinn.

2. gr.

Heimili Útvegsbankans, aðalskrifstofa og varnarþing er í Reykjavík. Auk aðalskrifstofunnar má setja afgreiðslustofur í Reykjavík eftir þörfum, og útbú má stofna utan Reykjavíkur eftir því, sem þörf þykir og ástæður leyfa.